

**Vol. 657**

**23 March  
Maart 2020**

**No. 43128**

## Contents

<i>No.</i>		<i>Gazette No.</i>	<i>Page No.</i>
<b>GOVERNMENT NOTICES • GOEWERMENTSKENNISGEWINGS</b>			
<b>354</b>	<b>Co-operative Governance and Traditional Affairs, Department of/ Samewerkende Regering en Tradisionele Sake, Departement van Disaster Management Act (57/2002): Regulations made in terms of Section 27(2) (Tswana translation) .....</b>	<b>43128</b>	<b>3</b>

---

**GOVERNMENT NOTICES • GOEWERMENTSKENNISGEWINGS**

---

NO. 354

23 MARCH 2020

**DISASTER MANAGEMENT ACT, 2002****MELAWANATAOLO E E REBOTSWENG GO YA KA KAROLO 27(2) YA *DISASTER MANAGEMENT ACT, 2002***

Nna, Dr Nkosazana Dlamini Zuma, Tona ya Tirisanommogo ya Puso le Merero ya Setso, ka taelo ka fa tlase ga Karolo 3 ya Disaster Management Act, 2002 (Molao 57 wa 2002) (Molao), morago ga kgoeletso ya maemo a bosetšhaba a matlhotlhapelo, e e phasaladitsweng mo Lokwalodikgannyeng la Puso la Nomoro 43096 ka di 15 Mopitlwe 2020, go ya ka Karolo 27(2) ya Molao, morago ga go rerisana le Maloko a Kabinete a a maleba, ke dira Melawanataolo e e tlhagisitsweng mo Šejuleng eno mabapi le dikgato tse di tlhokegang go thibela koketsego ya matlhotlhapelo kgotsa go ritibatsa, go baya ka fa tlase ga taolo le go fokotsa ditlamorago tsa matlhotlhapelo.

**DR NC ZUMA****Tona ya Tirisanommogo ya Puso le Merero ya Setso**

**KITSISO YA PUSO****LEFAPHA LA TIRISANOMMOGO YA PUSO****Nmr. R. 2020****DISASTER MANAGEMENT ACT, 2002: MELAWANATAOLO E E REBOTSWENG GO  
YA KA KAROLO 27(2)**

Tona ya Tirisanommogo ya Puso le Merero ya Setso o, go latela karolo 27(2) ya *Disaster Management Act, 2002* (Molao 57 wa 2002), morago ga go rerisana le maloko a Kabinete a a rwalang maikarabelo le ka kamogelo ya dithata tsa Moatlhodimogolo go ya ka karolo 165(6) ya Molaotheo, 1996ka puisommogo le karolo 8 ya *Superior Courts Act, 2013*, dira Melawanataolo mo Šejuleng.

**ŠEJULE****Ditlhaloso**

1. Mo Melawanataolong eno, ntle le fa bokao bo kaya ka mokgwa mongwe—  
**‘sebaka se se lekaneng’** se kaya palo e e sa feteng motho a le mongwe mo sekweremetareng sa boalofatshe;

**‘COVID-19’** e kaya Novel Coronavirus (2019-nCov) eo e leng bolwetse jo bo tshelanwang jo bo bakilweng ke mogare, jo bo tlhageletseng ka 2019 mme bo ne ba goeletswa jaaka tlhobaboroko go ralala lefatshe lotlhe ke WHO ka ngwaga wa 2020 jo bo iseng bo tlhagiswe ke tsa saense mo bathong;

**‘Molao wa Tsamaiso ya Bosenyi’** o kaya *Criminal Procedure Act, 1977* (Molao 51 wa 1977);

**‘motlhankedi wa kgatelelo’** o akarets leloko la Tirelo ya Sepodisi ya Aforika Borwa; Matsholotshireletso a Bosetšhaba a Aforika Borwa; le motlhankedi wa kagiso, jaaka go tlhalositswe mo karolong 1 ya Molao wa Tsamaiso ya Bosenyi;

**‘moabi’** o kaya motho, koporasi kgotsa mokgatlho o o fanang ka madi, mofuta oo le/kgotsa dithoto tse dingwe;

**'kokoano'** e kaya kgobokano nngwe le nngwe, phuthego kgotsa mokoloko wa batho ba feta 100, ka gotlhe kgotsa go le gonnye mo lefelong le le bulegileng kgotsa mo moagong kgotsa mo lepatlelong;

**'tthaolo'** e kaya go ntshiwa ga molwetse kgotsa motho yo o nang le bolwetse jo bo swaetsang mo bathong ba ba itekanetseng bao ba senang bolwetse jo bo swaetsang ka mokgwa wa go thibela kanamo kgotsa tshwaetso;

**'bojalwa'** bo kaya—

(a) setlhagiso sengwe le sengwe sa nnotagi, jaaka go tthalositswe mo karolong 1 ya *Liquor Products Act, 1979* (Molao 60 wa 1989);

(b) biri kgotsa bojalwa jwa setso; kgotsa

(c) kgotsa sengwele sengwe kgotsa seno se se tihomamisitsweng jaaka bojalwa ka fa tlase ga *Liquor Act, 2003* (Molao 59 wa 2003), mme ga se akaretse sepiriti;

**'maemo a bosetšhaba a matlhotlhapelo'** a kaya maemo a bosetšhaba a matlhotlhapelo a a goleditsweng ka Kitsiso ya Puso ya Nomoro R. 313 ya di 15 Mopitlwe 2020;

**'mafelo a tlhokomelo e e sa felelang'** a kaya lefelo le le neelanang ka tlhokomelo e e sa felelang jaaka go tthalositswe mo karolong 1 ya *Children's Act, 2005* (Molao 38 wa 2005);

**'kwarantini'** go tthaolwa ga batho ba ba bontshang matshwao bao ba ka tswang ba bonagaditswe mo bolwetseng jo bo tswang mo bathong ba ba sa bonagatswang ka mokgwa wa go thibela kgonego ya kanamo kgotsa tshwaetso;

**'sekolo'** se kaya sekolo jaaka go tthalositswe mo karolong 1 ya *South African Schools Act, 1984* (Molao 84 wa 1996); le

**'Molao'** o kaya *Disaster Management Act, 2002* (Molao 57 wa 2002).

**'WHO'** e kaya Mokgatlho wa Boitekanelo wa Lefatshe.

**Kgololo ya didiriswa**

2. (1) Lefapaha la Tshireletso le tshwanetse, sebaka sa nako ya go goeletswa ga maemo a bosetšhaba a matlhotlhapelo, go ya ka didiriswa tse ba nang le tsona—

(a) go golola didiriswa dingwe le dingwe tse ba nang le tsona, go akaretsa le metswedithuso ya setho, thoto e e bolokilweng, ditlamelo, dikepe, dipolatefomo tsa difofane, dijanaga le mafelo; le

(b) go netefatsa kabo ya ditirelo tsa botlhokwa, jaaka go ka tlhokega, go thibela, go lekanyetsa, go baya ka fa tlase ga taolo, go lwantsha le go laola kanamo ya COVID-19.

(2) Ditheo tsa puso tsa bosetšhaba di tshwanetse, go ya ka didiriswa tse ba nang le tsona, go golola badiri ba bona mabapi le kabo ya ditirelo tsa tshoganyetso, jaaka go umakilwe mo karolong 27(2)(b) ya Molao mabapi le maemo a bosetšhaba a matlhotlhapelo.

(3) Ditheo tsa puso ya bosetšhaba, porofense le selegae di tshwanetse go tlamela ka didiriswa, ntle le thuso ya ditšhelete, go tsenya melawanataolo eno mo tirisong kgotsa ditaello tse di rebotsweng go ya ka karolo 27(2) ya Molao o o mabapi le maemo a bosetšhaba a matlhotlhapelo.

(4) Ditheo tse di mo pusong ya bosetšhaba, porofense le selegae di tshwanetse—

(a) abelana ka thuso ya ditšhelete; le

(b) ka moo go kgonagalang ntle le go ama kabo ya ditirelo mabapi le phitlhelelo ya ditshwanelo tse di umakilweng mo dikarolong 26 go fitlha go 29 tsa Molaotheo wa Rephaboleki ya Aforika Borwa, 1996, go sutisa matlole,

mo tekanyetsokabong ya tsona go tsenya Melawanataelo eno kgotsa ditaello mo tirisong tse di rebotsweng go ya ka karolo 27(2) ya Molao, mabapi le maemo a bosetšhaba a matlhotlhapelo.

(5) Matlotlo a Bosetšhaba le matlotlo a diporofense a tshwanetse go tsaya dikgato tse di maleba mabapi le melao e e diriswang go tsenya Melawanataolo eno kgotsa ditaello mo tirisong tse di rebotsweng go ya ka karolo 27(2) ya Molao, mabapi le maemo a bosetšhaba a matlhotlhapelo.

(6) Thuso ya ditšhelete ya Baabi e e amogetsweng go thusa mabapi le maemo a bosetšhaba a matlhotlhapelo e tshwanetse go—

- (a) duelwa mo Letloleng la Kagoseša le Tlhabololo, le le tlhomilweng ka *Reconstruction and Development Fund Act, 1994* (Molao 7 wa 1994); le
- (b) dirisetswa fela maitlhommo a a go tsenya Melawanataelo eno kgotsa ditaelo mo tirisong tse di rebotsweng go ya ka karolo 27(2) ya Molao mabapi le maemo a bosetšhaba a matlhotlhapelo.

### **Thibelo le kganelo ya dikokoano**

3. (1) Gore go kgone go bewa kanamo ya COVID-19 mo taolong, kokoano ga e a letlwa.

(2) Motlhankedi wa kgatelelo o tshwanetse, fa kokoano e diragala—

- (a) go laela batho ba ba kokoaneng go phatlhalala ka bonako; le
- (b) fa ba gana go phatlhalala, tsaya kgato e e maleba, eo e ka, go latela Molao wa Tsamaiso ya Bosenyi, akaretsang kgolego le tshwaro.

(3) Kokoano ya batho ba feta 50 kwa mafelong a bojalwa bo rekiswang le go nwewa ga e a letlwa.

### **Go gana go dirwa diteko tsa bongaka, prophylaxis, kalafi, tthaolo le kwarantini**

4. Ga go motho ope yo o netefaditsweng ke tliliniki kgotsa laboratori gore o na le COVID-19, kgotsa yo go belaelwang gore o swaeditswe ke COVID-19, kgotsa yo o kileng a amana le motho yo o nang le COVID-19, yo o ka ganang go letla motlhankedi wa kgatelelo mabapi le go—

- (a) dirwa teko ya bongaka, go akaretsa mme go sa lekanyetswa mo go tseweng ga sekao sengwe le sengwe sa mmele ke motho yo o dumeletsweng mo molaong go dira jalo;
- (b) robatswa kwa setheong sa kalafi kgotsa kwa lefelong la kwarantini; kgotsa
- (c) dirwa prophylaxis ya taelo, kalafo, tthaolo kgotsa kwarantini gore go thibelwe tshelano:

Fa motho a sa obamele taelo kgotsa taelo ya motlhankedi wa kgatelelo, motho yoo o o tla tlhaolwa kgotsa o tla kwarantiniwa sebaka sa diura di le 48, go ya ka moo go tlhokegang, go sa letilwe lokwalotaelo e e tla rebolwang ke magiseterata, ka kopo e e dirilweng ke motlhankedi wa kgatelelo mabapi le teko ya bongaka e e umakilweng mo temaneng (a).

(2) Lokwalotaelo le le umakilweng mo molawanataolong (1) le ka rebolwa ke magiseterata, fa go tlhagelela mo tshedimosetsong ya maikano kgotsa netefatso ka motlhankedi wa kgatelelo—

(a) gore go netefaditswe gore motho o swaeditswe ke COVID-19;

(b) yo ka mabaka a a utlwagalang go belaelwang gore o kile a amana le, kgotsa yo ka mabaka a a utlwagalang go belaelwang gore o ne a na le kamano le motho yo o nang le kgotsa yo o swaeditsweng ke COVID-19.

(3) Lokwalotaelo le ka pateletsa dikganelo mo dithateng tsa motlhankedi wa kgatelelo go ya ka moo magiseterata a bonang go le matshwanedi.

(4) Lokwalotaelo le le rebotsweng go ya ka molawanataelo ono le tswelela go diriswa go fitlhela—

(a) le diragatswa;

(b) le phimolwa ke motho yo o le rebotseng kgotsa, fa motho yoo a seyo, ke motho mongwe le mongwe wa bolaodi jo bo tshwanang;

(c) go ya bokhutlong ga matsatsi a le masome a robongwe go simolola ka letlha le le rebotsweng ka lona; kgotsa

(d) maitlhommo mabapi le go rebolwa ga lokwalotaelo a feletswe ke nako, nngwe le nngwe e e diragalang pele.

(5) Ga go motho ope yo o tshwanetsweng ke phimolakeledi mabapi le tatlhegelo kgotsa tshenyegelo nngwe le nngwe e e ka diregang ka ntlha ya tiro kgotsa tlolo nngwe le nngwe e e dirilweng ka mowa montle ke motlhankedi wa kgatelelo ka fa tlase ga molawanataelo ono.

### **Mafelo a kwarantini le tlhaolo**

5. (1) Tona ya Ditiro tsa Setšaba le Mafaratlhatlha o tshwanetse go supa le go netefatsa gore mafelo a teng a a tla diriswang jaaka mafelo a tlhaolo le kwarantini fa go nna le tlhokego.

(2) Maloko a Khanselekhuduthamaga a a rwalang maikarabelo a ditiro tsa setšhaba a tshwanetse go supa le go netefatsa gore mafelo a teng a a tla diriswang jaaka mafelo a tlhaolo le kwarantini mo porofenseng e nngwe le e nngwe fa go nna le tlhokego.

(3) Batlhankedi ba ba rwalang maikarabelo a dimmasepala o tshwanetse go supa le go netefatsa gore mafelo a teng a a tla diriswang jaaka mafelo a tlhaolo le



kwarantini mo mafelong a bona a selegae, le go tlamela Lefapha la Boitekanelo ka lenane mabapi le go tlamela ka didiriswa.

### **Go tswalwa ga dikolo le mafelo a tlhokomelo e e sa felelang**

6. Dikolo le mafelo a tlhokomelo e e sa felelang di tshwanetse go tswalwa ka di18 Mopitlwe 2020 go fitlha ka di 15 Moranang 2020, mme paka eo e ka atoloswa ke leloko la kabinete le le rwalang maikarabelo go fitlhela ka paka ya maemo a bosetšhaba a matlhotlhapelo.

### **Tshekego ya maeto**

7. Maeto otlhe a baagi go—

- (a) Mafelo a Kgopololo,
- (b) Mafelo a Tswalelo ya Balatofatswa,
- (c) Mafelo a Tlhatlhelo;
- (d) Mafelo a Tswalelo a Sesole; le
- (e) Mafelo a Lefapha la Tlhabololo ya Loago, go akaretsa le Disenthara tsa Tlhokomelo ya Bana le Bašwa, mafelo a tshireletso, Disenthara tsa Ditirelo Tsotlhe, Disenthara tsa kalafi

a sekegilwe sebaka sa paka ya matsatsi a le 30 go simolola ka letlha la phasalatso ya Kitsiso eno, mme paka eo e ka atoloswetswa go paka e nngwe, mme ga e a tshwanela go feta paka ya maemo a bosetšhaba a matlhotlhapelo ke leloko la kabinete le le rwalang maikarabelo.

**Go bewa ga selekanyo sa dithekiso, phatlhalatso kgotsa thomelo ya bojalwa**

8. (1) Mafelo otlhe a go nwela bojwala a a rekisang bojalwa, a a akaretsang le dithabene, diresetšhuranta le ditelapo, a tshwanetse go tswalelwa ka bonako, kgotsa a tshwanetse go tshola batho ba sa fete 50 nako nngwe le nngwe: Fa fela go na le sebaka se se lekaneng e bile ditaelo tsotlhe mabapi le mabaka a boitekanelo le tekanyetso ya go bonagatsa batho go COVID-19 di obamelwa.

(2) Mafelo otlhe a a rekisang bojwala a a tlamelang ka marobalo a tshwanetse go tsenya mo tirisong ditsela tsa go thibela kanamo ya COVID-19: Fa fela go na le sebaka se se lekaneng e bile ditaelo tsotlhe mabapi le mabaka a boitekanelo le tekanyetso ya go bonagatsa batho go COVID-19 di obamelwa.

(3) Ga go dilaesense dipe tsa kgethego kgotsa tsa ditiragalo tsa bojalwa tse di tla rebolwang ka nako ya maemo a bosetšhaba a matlhotlhapelo.

(4) Mafelo otlhe a go nwela bojwala a a rekisang bojalwa a a kailweng mo molawanataolotlaleletsong (1) a tshwanetse go tswalelwa—

(i) magareng ga 18:00 le 09:00 mo mosong o o latelang mo gare ga beke le ka Lamatthatso; le

(ii) go simolola ka 13:00 ka Sontaga le ka matsatsi a khunulogo.

(5) Mafelo otlhe a go sa nwelweng bojwala mo go ona a a rekisang bojalwa a tshwanetse go tswalelwa—

(i) magareng ga 18:00 le 09:00 mo mosong o o latelang mo gare ga beke le ka Lamatthatso; le

(ii) go simolola ka 13:00 ka Sontaga le ka matsatsi a khunulogo.

**Ditsamaiso tsa Theko ya Tshoganyetso**

9. Theko ya tshoganyetso ya ditheo e go latela—

(a) *Public Finance Management Act, 1999* (Molao 1 wa 1999), e bile ditaelo tse di diriswang tsa tshoganyetso mo Melwanataolong kgotsa Ditaelong tse di dirilweng ka fa tlase ga karolo 76 ya Molao oo; le

- (b) *Municipal Finance Management Act, 2003* (Molao 56 wa 2003), e bile ditaelo tse di diriswang tsa tshoganyetso mo Melwanataolong e e dirilweng ka fa tlase ga Molao oo,

### **Bolaodi jwa go rebola ditaelo**

**10.** (1) Tona ya Boitekanelo o ka—

- (a) rebola ditaelo go sekaseka, go thibela le go lwantsha kanamo ya COVID-19 mo lefelong lengwe le lengwe mo Rephaboleking ya Aforika Borwa, mme ditaelo tseo di ka akaretsa—
- (i) patlo le katiso ya metswedithuso ya setho go tswa kwa Lefapheng la Boitekanelo, le ditheo tse dingwe tse di rwalang maikarabelo a go tshwarwa ga ditopo tsa COVID-19;
  - (ii) thomelo ya metswedithuso ya setso go tswa kwa Lefapheng la Boitekanelo go ya kwa lefelong le le kailweng go neelana ka ditirelo;
  - (iii) tseo ya metswedithuso ya setho go tswa kwa Lenaneokatolosong la Ditiro tsa Setšhaba, badiri ba seporfešene ba boitekanelo ba ba rotseng tiro le Mekgatlho e e Seng ya Puso go abelana ka ditirelo kwa mafelong a a kailweng;
  - (iv) tlamelo ya ditlamelo tsa kalafi, dimateriale tsa kgeleloleswe le ditlamelo tsa bongaka;
  - (v) tshupo le tlhomo ya dimmošara tse go tla bewang ditopo tsotlhe tsa COVID-19; le
  - (vi) tatlho ya ditopo tsa COVID-19; le
- (b) fetola ditaelo tse di kailweng mo temaneng (a) go ya ka moo mabaka a kaelang ka teng.

(2) Tona ya Bosiamisi le Ditirelo tsa Kgopololo o ka—

- (a) rebola ditaelo go sekaseka, go thibela le go lwantsha kanamo ya COVID-19 kwa Mafelong otlhe a Kgopololo le kwa Mafelong a Tswalelo ya Balatofatswa mo Rephaboleking ya Aforika Borwa; le
- (b) ka therisano le Moatlhodimogolo, fa go le maleba, rebola ditaelo go sekaseka, go thibela le go lwantsha kanamo ya COVID-19 kwa dikgotlatshekelong tsotlhe le kwa mafelong a dikgotlatshekelo mo Rephaboleking ya Aforika Borwa; le

(c) fetola ditaelo tse di kailweng mo ditemaneng (a) le (b) go ya ka moo go tlokegang ka teng.

(3) Ditona tsa Thuto ya Motheo le e Kgolwane ba ka —

(a) rebola ditaelo go sekaseka, go thibela le go lwantsha kanamo ya COVID-19 mo dikolong tsotlhe le ditheong tsa thuto e kgolwane; le

(b) fetola ditaelo tse di kailweng mo temaneng (a) go ya ka moo mabaka a kaelang ka teng.

(4) Tona ya Sepodisi o ka—

(a) rebola ditaelo go sekaseka, go thibela le go lwantsha kanamo ya COVID-19 kwa diteišeneng tsa mapodisi, mafelong a mapodisi, le kwa mafelong a tswalelo; le

(b) fetola ditaelo tse di kailweng mo temaneng (a) go ya ka moo go tlokegang ka teng.

(5) Tona ya Tlhabololo ya Loago o ka—

(a) rebola ditaelo go sekaseka, go thibela le go lwantsha kanamo ya COVID-19 kwa mafelong otlhe a Lefapha la Tlhabololo ya Loago; le

(b) fetola ditaelo tse di kailweng mo temaneng (a) go ya ka moo mabaka go tlohegang ka teng.

(6) Tona ya Kgwebo le Indaseteri o ka —

(a) rebola ditaelo go—

(i) sireletsa bareki kgatlhanong le peotlhotlwa ya dithoto le ditirelo e e sa lolamang, e e seng ya lebaka e bile e sa siama e e nnang teng ka ntlha ya maemo a bosetšhaba a matlhotlhapelo; le

(ii) tshegetsatshireletso ya tlamelolo ya dithoto le ditirelo e e nnang teng ka ntlha ya maemo a bosetšhaba a matlhotlhapelo; le

(b) rebola ditaelo go sekaseka, go thibela le go lwantsha kanamo ya COVID-19; le

(c) fetola ditaelo tse di kailweng mo ditemaneng (a) la (b) go ya ka moo go tlokegang ka teng.

(7) Tona ya Dipalangwa o ka—

(a) rebola ditaelo go sekaseka, go thibela le go lwantsha kanamo ya COVID-19 mo mererong e e welang ka fa tlase ga taolo ya gagwe; le

(b) fetola ditaelo tse di kailweng mo temaneng (a) go ya ka moo go tlokegang ka teng.

(8) Tona mongwe le mongwe o ka rebola le go fetola ditaello go ya ka taolo ya gagwe, go sekaseka, go thibela le go lwantsha kanamo ya COVID-19, nako le nako, jaaka go ka tlhokega, go akaretsa le go—

- (a) phatlhalatsa tshedimose tso e e tlhokegang mabapi le go samagana le maemo a bosetšhaba a matlhotlhapelo;
- (b) tsenya mo tirisong ditsamaiso tsa theko ya tshoganyetso;
- (c) tsaya dikgato dingwe le dingwe tse di ka tlhokegang go thibela koketsego ya maemo a bosetšhaba a matlhotlhapelo, kgotsa go ritibatsa, go baya ka fa tlase ga taolo le go fokotsa ditlamorago tsa maemo a bosetšhaba a matlhotlhapelo; kgotsa
- (d) tsaya dikgato go nolofatsa thuso ya boditšhabatšhaba.

### **Ditlolomolao le dikotlhao**

11. (1) Mabapi le maitlhommo a molawanataolo 3, motho mongwe le mongwe yo o—

(a) rulaganyang kokoano;

(b) letlang kokoano ya batho ba feta 50 kwa lefelong le go rekiswang le go nwela bojwala; kgotsa

(c) kgoreletsang, thibelang, kgotsa kganelang motlhankedi wa kgatelelo mo go diragatseng dithata tsa gagwe, kgotsa mo go direng ditiro tsa gagwe go ya ka Melawanataolo eno,

o bonwa molato wa tlolomolao e bile, fa a atlhotswe, o rwala maikarabelosemolao a tuediso kgotsa go romelwa kgolegelong dikgwedi tse di sa feteng tse thataro kgotsa ka bobedi tuediso le go golegwa.

(2) Motho o bonwa molato wa tlolomolao fa motho yoo a retelwa ke go obamela kgotsa a tlola ditaello tsa melawanataello 6 le 9 ya Melawanataolo eno.

(3) Motho yo o bonweng molato wa tlolomolao e e kailweng mo molawanataolotlaleletsong (2) o tla rwala maikarabelosemolao a tuediso kgotsa go romelwa kgolegelong dikgwedi tse di sa feteng tse thataro kgotsa ka bobedi tuediso le go golegwa.

(4) Motho mongwe le mongwe yo ka bommo a dirang puo e e fosagetseng ya gore ena kgotsa motho ofe o swaeditse ke COVID-19 o bonwa molato wa tlolomolao e bile fa a atlhotswe o rwala maikarabelosemolao a tuediso kgotsa go

romelwa kgolegelong dikgwedi tse di sa feteng tse thataro kgotsa ka bobedi tuediso le go golegwa.

(5) Motho mongwe le mongwe yo o dirang polelo, ka mokgwa ofe wa tlhaeletsano, go akaretsa le tlhaeletsano ka inthanete, ka maikaelelo a go tsietsa motho ofe ka ga—

- (a) COVID-19;
- (b) maemo a tshwaetso ya COVID-19 a motho ofe; kgotsa
- (c) dikgato dife tse di tserweng ke Puso go samagana le COVID-19,

o tlola molao e bile o rwala maikarabelosemolao fa a bonwe molato o rwala maikarabelosemolao a tuediso kgotsa go romelwa kgolegelong dikgwedi tse di sa feteng tse thataro, kgotsa ka bobedi tuediso le go golegwa.

(6) motho mongwe le mongwe yok a bomo a bonagatsang motho yo mongwe go COVID-19 o ka sekisetswa tlolomolao, go akaretsa le tlhaselo e e masisi, teko ya polao kgotsa polao.

## **Tshimololo**

12. Melawanataolo eno e simolola go tsena mo tirisong ka letlha la phasalatso.